

四庫全書

集部

欽定四庫全書

集部

青山集

目錄  
卷一至五

詳校官中書臣閔恩毅

侍讀臣孫球覆勘

覆校官博士臣劉光第

校對官中書臣王璜

謄錄監生臣藍嘉瑞

欽定四庫全書

集部三

青山集

別集類二宋

提要

臣等謹案青山集三十卷續集七卷宋郭祥  
正撰祥正字功父當塗人熙寧中舉進士官  
至汀州通判攝守漳州事迹具宋史本傳晁  
公武讀書志陳振孫書錄解題皆載祥正青  
山集三十卷王士禎居易錄曰郭祥正青山

集閩謝氏寫本六卷古詩二卷近體詩四卷  
七言歌行僅二篇或有闕文是士禎所見已  
為傳寫殘闕之本此本三十卷與晁陳二家  
所載合猶完書矣又續集七卷晁氏陳氏均  
不載宋史藝文志亦不著錄前後無序跋莫  
審誰所編次然核其詩格確出祥正非後人  
所能依托其中紀述頗足與史傳相參考如  
史稱祥正致仕後居於姑孰不復干進所居

有醉吟菴久之起為通判汀州後知端州復  
棄去家於當塗之青山以卒今續集中有浪  
士歌一首自序云郭子棄官合肥歸姑孰自  
號曰醉吟先生居五年或者謂其未老可仕  
以事薦於上上即召之復序於朝俾監閩汀  
郡尋攝守漳南上復召之行至半道閩使者  
狀其罪以聞遂下吏留於漳幾三年又自號  
曰漳南浪士云云集中留漳南詩甚多則史

所云知端州後復棄官者非也又漳南書事  
云元豐五年秋七月十九日猛風終夜發拔  
木壞廬室新昌吟寄潁叔待制云元祐丙寅  
冬新昌有狂寇名探其姓岑厥初善巫咒云  
云按元豐五年至元祐元年丙寅正合詩序  
所云留漳南三年之數然則祥正被議下吏  
在元豐五年而其得歸也在元祐元年而岑  
探搆亂之事史未及詳則亦漏書也又青山

集載送蔣穎叔待制拜六路都領詩云廊廟  
之材終大用願敷和氣及巖幽自注云予已  
乞骸將歸舊廬再送穎叔云雲間驥尾終難  
附梅子黃時公自歸自注云公屢有佳句見  
約同歸復有蒙詔許歸絕句二首其次韻林  
辨之長官送別之什云牢落名聲讒謗後支  
離形影瘴氛餘從來仕路誰為援却返家園  
數自如以此數詩合之續集浪士歌之所自

序其載出一節事蹟始備可以補本傳之缺  
惟史稱祥正以上書諛頌安石反為安石所  
擠坐是偃蹇以終而續集內有熙寧口號五  
首末云百姓命懸三尺法千秋誰恤兩端情  
近聞崇尚刑名學陛下之心乃好生云云殊  
不似推薦安石者青山集有奠王荊公墳三  
首云大手曾將元鼎調龍沈鶴去事寥寥又  
云平昔偏蒙愛小詩如今吟就誰復知云云



又不似見排於安石者其是非自相矛盾蓋  
述知己之感所以自明依附之因刺新法之  
非所以隱報擯斥之憾小人褊躁忽合忽離  
往往如是不必以前後異詞疑也其詩好用  
仙佛語或偶傷拉雜而才氣縱橫吐言天拔  
史稱其母夢李白而生陸游入蜀記亦稱祥  
正少時詩句俊逸前輩或許為太白後身又  
稱青山太白祠以祥正侑食蓋因其詩格相

近從而附會然亦足見其文章驚邁時似青蓮故當時有此品目也其人至不足道而其集猶傳厥有由歟考東坡集有郭祥正家醉畫竹石壁上郭作詩為謝且遺二古銅劍一首王十朋東坡集注又有祥正觀東坡畫雪有感詩二首青山集俱失載而續集亦無之疑不免有所散佚然較比謝氏之本則完備多矣乾隆四十一年五月恭校上

總纂官臣紀昀臣陸錫熊臣孫士毅

總校官臣陸費墀



[illegible]

欽定四庫全書

青山集卷一

宋 郭祥正 撰

楚辭體

補到難

并序

真陽有山削立出江上陰翳其外軒豁其內名為碧落洞  
天唐周夔羽皇題文命曰到難言其去中國之遠而賢士  
大夫之所難到也詞則麗矣然未能盡碧落之狀予取其言  
而補之題曰補到難篇云

到乎難哉碧落之洞天上  
有嵐壁之瑤局下有澄溪之  
碧瀾碧瀾之下寸寸秋色  
目窺之而可量手搴之而莫  
得竇容光而練飛巖漬陰而  
乳滴如長人如巨虵如翔  
龍如鏤鏤如倒植之蓮如已  
剖之瓜如觸邪之獬豸如  
蝕月之蝦蟇或斷而卧或起  
而立或欲鬪而搏或驚顧  
而呀若斯石也吁可怪耶何  
詭絕之異觀嘗置之于幽  
遐到乎難哉長蘿美秀瘦木  
竦直香櫻寒而自媚名槩  
詢而鮮識烟霏霏而引素雲  
悠悠而奮翼亟模似其變

態已滅然而無迹崩漸遠響磬落瑟續聆之愈深詠之  
不足欲幽棲而忘返尚徘徊而眷祿彼寧待乎世人蓋  
有要于仙躅到乎難哉信夫到之難也匪到之難知樂  
此以為難知樂此矣能久處之又為難余故補到難以  
題篇些

巫山送吳延之出宰巫山

送子之邑兮山之嵯嵯繫物之可賦兮曰如之何虛徐  
悅耀兮匪車匪馬匪足匪翼兮奮于巖阿薄萬象兮周

四海爛五采兮揚天波倏然悄然以自斂  
妥輕素兮縈翠螺容與兮窈窕行止兮委蛇吐兮若英攢兮若葩聚  
若白蟻散若楊花爰有靈依兮遂異于他對之自然又  
不可求逐之無迹愴我離憂上下無窮變化周流亂曰  
綿延天矯兮竟何補贊天工兮濡厚土舒則有時兮卷  
則有所不為神女兮而為君子

山中

風蕭蕭兮雲藹藹泉淙淙兮石皚皚禽驚人兮遠飛去



以復還客醉其間兮殊不知為冠帶髮被衣頽以自顧  
兮誰為吾仇山花為我一笑兮山草為我以忘憂嗟世  
人之愚兮竟營營以何求求百年之寵榮兮取萬世之  
奴囚怵讒舌之甚兮尚毀孔而謗周咄何得而何失兮  
孰為馬而為牛歌數作兮飲未休石駭以走兮泉凝而  
不流起挽石以道泉兮爾何我叛吾將去乎世兮結爾  
以長年之遊

招遜

遯兮樂歟吾能為子言之山高水長兮遯歲月而忘歸  
朝採木兮遯而食暮葺蓑兮遯而衣雲徜徉兮出岫奮  
吾心兮與期日躅躅兮行天弔吾影兮沈西委吾形兮  
自信豈塗檢之詰曲兮能屈伸而騫馳遯其樂兮吾能  
為子重言之林之深則鳥獸遯而樂水之深則魚龍遯  
而樂帝者之道備則生民遯而樂遯將獨樂乎哉吾弗  
與也于是作招遯之辭辭曰來音離馬肥馭良兮遲子  
以歸虎豹齧人兮胡獨為宜朝有好爵兮廩有好祿遯

勿遯兮于斯之時

言歸

休歟歸乎何為而言哉予七齡而孤兮託慈育以苟生  
捉手以筆兮口授以經緒先子之素訓兮夜未央而丁  
寧既束髮以就學兮入必問其與游聞道之進兮曰使  
我以忘憂課蠶而織兮紉衣以先汝使弗墜業兮我勞  
而汝處慨薄德之眇末兮今愈壯而不揚吾母耄兮戀  
故鄉雖得邑而祿兮曾寤寐之弗遑與音問之吉兮孰

若朝夕而在傍誰繫予足兮眷白雲之徜徉還印綬于  
有司兮賢守足以往訴將俟代而返兮念歲月之云暮  
休歟歸乎春山施施春水瀾瀾春蒲濯濯春魚尾尾吾  
親在前吾子在後飲甘滌潔以介眉壽

### 廣言歸

予將歸兮而有言德眇薄兮言弗見信

音伸

孝乎為孝兮

友于弟舅奚為為政兮予之所存慨日月兮往而不返  
吾親八十分事之云晚朝廷清明兮予忠曷施道弗行

于家分何以教吾民之為哉嗚呼耕吾土分足以食條  
吾桑分足以衣予奉親分孰不可樂予治身分尤以為  
宜蹇何憂分何思恬無悶分無知休歟歸乎以退為進  
分予發諸誠乎賢誰弗信乎

泛江

歲在庚子月惟孟冬蹇予職事鼓楫長江感慨其懷而  
為之辭云士有以處分無畝以耕眷餘緒之尚抽分慨  
慈親以遲榮徐虛縮瑟以內習分予實愧乎先民之心

愔愔惻愴其不得已兮被命于九江之潯戴皇天之休  
兮廩足以飽度白日之難兮誰察予情汹汹兮北風怒  
浪兮滔天撫慈膝兮出門淚漣漣兮就船事將有責兮  
死豈予之所畏蓋忠未足以盡報兮孝未克以自信惟  
行止之坎坎兮適簡罪以冀生度白日之難兮誰察予  
情蛟嚙齒兮岸摧蜃矯首兮渡分妖鱗怪鬣曾莫識其  
名兮怒齧牙以相矚數將傾而還復兮予委命乎上靈  
幸生全而就泊兮夜風止而月吐曠上下之澄澈兮適

縱觀乎琉璃之府北斗揚光兮百怪潛伏岸芷露翠兮  
汀蘭放芬起予思之無窮兮既跼影以自慰又苦辭以  
招魂辭曰始凶終吉魂兮歸來奚往而失

殤愁

氣氛氛兮隘如魂颺颺兮寧居慧言在耳兮疇能捨諸  
異質沈壤兮委夫頑虛鴻雁零飛兮若獨何趨蘭茝早  
悴兮天孰與辜雄雌啼兮巢失佳雛天地黯黯兮風  
雨呼呼旖翩翩兮導衢夜冥冥兮冰殊樽有醑兮鼎有

魚享弗享兮日月云徂

醉翁操

泠泠潺潺寒泉瀉雲間如彈醉翁洗心逃區寰自期猿  
鶴俱閒情未闌日暮向深源異芳誰與搴忘還

泛聲瓊

樓玉闕歸去何年遺風餘思猶有猿吟鶴怨花落溪邊  
蕭然鶯語林中清園空山春又殘客懷文章仙度曲響  
涓涓泛商回徵星斗寒

古思歸引

石季倫有其  
序而亡其詞



昔人思歸兮宅林藪之邃深阻長隄而臨清渠兮芬翳  
翳以交陰有觀閣池沼兮通泉溜而附嶽崱蹇美羽之  
翔集兮嘉魚樂而浮沈時則命宴于芳晨兮連親戚與  
佳賓執樂而侍兮列秦趙之艷人管絃奏兮歌悠揚而  
絕塵漿蘭桂兮羞肴珍左琴右書兮助為娛而養真又  
期于不朽兮志傲然而陵雲孰與婆娑于九列兮顧牽  
羈于繁文曲有絃而無辭兮述予懷以自信申歌曰日  
轂馳兮老將至鑠外紛兮中系累歸去來兮予之思放

吾形兮聊逍遙以卒歲

補易水歌

燕雲悲兮易水愁壯士行兮專報仇車轢轢兮馬蕭蕭  
客送發兮酌蘭椒擊筑兮啞咽歌變徵兮思以絕易水  
愁兮燕雲悲四座傷兮皆素衣歌復羽兮慷慨髮上指  
兮淚交揮又前為歌曰風蕭蕭兮易水寒壯士一去兮  
不復還

思嵩送劉推官赴幕府

我思嵩兮三十六峯之蔥蒼雲霞卷舒兮紛五色而爛  
朝陽渺羣仙之不可見兮時有鸞鶴雙翔窮崖斷壑  
兮飛泉吼怒春琳琅儼脩松與美竹兮碧離離而低昂  
考周室之卜世兮顧八表為中央天乃寵于吾宋兮六  
陵相差而永藏惟傳祚之億萬兮豈八百以為之長引  
伊洛之二水兮聿通汴而注揚回黃流于故道兮滅湍  
射而汪洋橫星橋于河漢兮紫闕峙而煒煌列槐植之  
行杭秀兮歷五代而經唐承太平之雨露兮幸不遭乎

伐戕為衆木之耆父兮如羽蓋之迭張慨離彼而適此  
兮亦出處之靡常既寓情于物表兮獨思嵩之未忘忽  
有客兮鼓楫言別我兮靈羊將度庾嶺沿濤江涉淮沂  
汴入幕乎洛陽詞氣有餘頗挫鏗鏘誠南士之穎出然  
未始離乎炎荒請陟嵩而遠覽循今古而徜徉矯垂天  
之翼粲瓊瑤之章于是被詔音登玉堂返眎乎羅浮朱  
明如棄魚目而懷夜光也

王逢原哀詞

追髣髴兮故國之高丘與子之相遇兮聽其言而若秋  
雍雍而肆兮嚴嚴而收樂我之心兮以遨以遊予將娶  
兮于南州莫克從子兮翻自省以幽幽川陸兮沈浮日  
月兮再周云子之長逝兮愴我之深憂子不可見兮道  
將誰求彼蒼者天兮胡慘胡讐奪子之速兮使不位于  
公侯雖窮德之特立兮弗與世以綢繆嗟坎水之未盈  
兮竟何澤以休休瘖予之聲兮血予之眸猶不足以止  
兮靈何在而薦羞惟永絕兮奈何悵平昔兮悠悠

徐孺興哀詞

嗟乎孺興之不幸兮上有高堂白髮之慈親孝不克以

自信

平聲

兮魂將逝而復返目冥冥而莫勝兮顧天命之

予

上聲

短業脩脩兮志與道配寂不少振兮遽沈幽而終

蹇蘭未芳兮先凋月將昇兮俄隕孺人囁囁兮追話言

之弗足夢悠悠兮魂去來而數

入聲

感撫稚子兮秋夜長

暗明璫兮摧腕玉魂何知兮興予之哀體與道化兮歲

月徂而屢周情纏綿兮若俱往則已矣詞不足以盡寄

兮託餘思于江流

留君儀哀詞

南漳留定君儀才行之士也嘗有德于予今其卒矣故  
為之詞以哀之

懷伊人兮漳水之湄爰結好之初兮予方出乎陷穽之  
羈縻彼知予之橫罹兮眷煢煢而弗支氛侵侵而襲人  
兮子獨贈我以蘭芝芳芬芬而爽吾衷兮雖厄窮而弗  
疑言涓涓而洗吾耳兮寂塵聽而淒其炊嘉黍而納吾

腹兮使朝則忘饑采薜荔為予之服兮慨前脩之可追  
脂吾車而秣吾駟兮造仙的之幽奇煮甘溜而茗酌兮  
珍盤進乎離支唱則和兮迭指摘其醇醪同底于道兮  
遵聖渚為之歸聊容與以卒歲兮曾弗察乎白駒之騫  
馳泊中吉而啓行兮觴桂漿以違離惕南北之緬邈兮  
蹇形影之頽衰歌激揚而再發兮淚浪浪以沾衣馬悲  
鳴而仰顧僕弛負以增欬行雲住而黯慘去鳥返而低  
迷歲聘介而一至兮孰敢為之後期幸再往而再復兮



釋予心之思也忽承訃以躑躅兮行不知其所之也嗟  
若人之蘊美兮天其奪之速也蹇松柏之枯折兮惡植  
則滋以榮也考大空之役物兮必善搏而化之也將為  
麟為鳳兮對明世而出也將為蘭為蓀兮芬馨香而薦  
上帝也將為江為河以濟舟也將為雨為露而澤物也  
將復為人兮英華于士林也將為仙為神兮自適于逍  
遙之境也嗚呼以甚塞之懷兮測乎無涯之朕以有限  
之情兮導乎無窮之悲嗚呼其有知乎其無知乎吾其

能久乎吾將從子于重泉之游乎吾又何詞之哀乎

山中樂 并序

歐陽公有山中樂三章送惠勤師歸杭後四十年勤師之孫元竦上人頗好吟詠從予遊且言思歸舊栖因擬山中樂一章以勸其歸其詞有同有不同亦各言其志也必有讀者能得之

歸乎樂哉山中之樂兮其樂無窮藹蔥蒼而杳嶺叢兮  
蒼青瑤之諸峯琉璃一碧兮湖波止而溶溶層樓相望

曲徑相通魚龍轉影于汀瀾之際鐘梵答響于烟雲之  
中鳥嚶日暖兮花氣濛濛寒密葉而成幄兮風颯颯而  
吹松巖谷玲瓏霜木落也玉宇浮空冰漸凝也天高月  
朗兮定省乎華嚴之境雷奔雨驟兮作新乎水墨之宮  
達僧擬王孫之葬師逸士法林躡淵明之蹤方爾祖之  
得名兮考其言于廬陵之醉翁曰嗟世之人兮曷不歸  
來乎山中山中之樂不可見今予其往兮誰逢後四十  
年爾復好吟遠遊不反求我之從勸爾之歸兮栖老乎

山中爾之材兮甚良當自適其無庸之庸違世絕俗黜  
明塞聽山中之樂兮乃可以久非我與爾兮誰同

石室游

端城之北徑五六里有石室兮洞開其上則七山建斗  
司天之喉舌其下則淵泉不流渟碧一杯窺之則肌髮  
冰去聲酌之則煩心灰四傍則石乳玲瓏中敞圓蓋窈窕  
萬丈莫窮其厓孰納忠兮嗟肺肝之已露孰止戈兮束  
兵仗而相挨儼衛士之行列肅庭臣之序排紛披披兮

蒂萼粲樅樅兮條枚安而不可動者為梁為棟奔而不  
可止者為虎為豺龜闔首兮屏息蚌奮鱗兮搏雷怪怪  
奇奇兮千變萬態愈眎愈久兮惚恍而驚猜何人境之  
俯近而仙宇之秘異如此者哉蘿卷風兮窈窕春清芳  
兮不迴或命佳客或寓幽懷考二李之勁筆邕皆一時  
之遺材援玉琴以寫詠悵夕陽之易頽方謝事以言返  
眷茲室而徘徊雲惝容兮泱泱鳥送音兮悲哀況百年  
之將盡邈夫萬里奚復來

逍遙園

并序

筠州之城西有園名曰逍遙因山而得名今鄒君幾聖大夫之所有也予作逍遙園一首以贈幾聖云

逍遙有水一溪有竹三畝蘭芬菊芳松老石瘦堂居其中亭列左右菲菲兮春榮陰陰兮夏茂孤猿嘯兮秋夜長空桑皁兮冬雪畫山之名兮人莫知公為主兮天所授其或要佳賓酌醇酎清吟得韻兮非人世之絲篴屬筆成篇兮發天機之錦繡方且登高臺挹遠岫俯仰羣

仙咨詢遐壽脫輪蹄之縈服烟霞之秀于斯時也一舉  
九萬兮吾不知其為用嗒焉自喪兮吾不知其為偶脩  
兮窅兮非無之無寂兮息兮非有之有無何亦何得而  
名有寂則寂遽能久至若聽出于垣觀入于牖此鄙士  
之常習又安得與夫逍遙主人而為之友也哉

孤雲寄潘延之先生

望孤雲兮山之巔潸弗雨兮何油然送孤鴻兮海之涘  
高舉翼兮游無邊彼君子之如似兮脫世俗以不返奚

無悶而止兮又放意以窮年川有航兮陸有馬園有佳  
木兮池有芳蓮坐卧兮白日笑歌兮朱絃客至止兮樂  
我之樂豈公侯之下兮曾弗擇乎愚賢僕夫以耕兮妾  
女以織恬弗愧兮我衣我食神仙之道遙兮固不得以  
見之君子之宴息兮舉斯世以誰敵嗟世人之自徇兮  
莫知其求勢得而傲兮勢失而囚靡後先之思兮孰進  
退之由苟歲月之徙兮託冠帶以包羞惟勇子之從兮  
貧未足以自周匪妻子之累兮實吾親之憂慨負重兮



執熱慕坦跣兮臨流

采薇山之巔贈張無夢先生

先生曰采薇山之巔兮吾非求為之仙吾無一畝之宅  
一丘之田饑食山之薇渴飲山之泉巖為吾居兮鹿為  
吾馬吾豈不足兮翱翔乎山之間彼世俗之混混兮嗟  
苦短之白日此一身之悠悠兮聊自樂以窮年彼塵埃  
之荏苒兮此雲烟之綿聯誰謂才之大兮慨匠氏之弗  
取吾獨幸其弗取兮森葱蒼而自全粵吾君之為治兮

三王之聖而吾相之為輔兮伊周之賢吾父吾母兮皆善  
終以天算進何憂而退何憾兮養吾氣之浩然弟子進  
而贊曰采薇山之巔兮其樂也如此衣曳曳而情飄飄  
兮願執轡而往焉

青山集卷一

欽定四庫全書

青山集卷二

宋 郭祥正 撰

歌行

姑蘇行

送胡唐臣入幕  
又送朱伯原秘校

登姑蘇望五湖  
范蠡扁舟竟何在  
吳王宮殿惟荒墟  
使君誰何好平恕  
寬則脂韋猛則虎  
只今卧治聞黃公  
更得高才歸幕府  
願令里巷歌召南  
風化流行成樂土  
昔年引對大明殿  
國論軒軒動人主  
往持使節臨朔方  
威

霽秋霜愛春雨玉上青蠅誰強指鼻端有堊寧傷芥升  
沈偶爾非吾嗟不用東方且為鼠豈聞絕代無佳人何  
必西施妙歌舞盛傾綠酒鱠肥鱸承詔還從大梁去

泠泠浣溪水悠悠天柱雲雲行水光動水洗雲影分幽  
人坐卧吟孤絕迴出羣資彼雲水秀釋此塵垢紛胡為  
倏言別扁舟連夜發往登姑蘇臺而望太湖月却尋吏  
遷迹但見蒼烟滅覽古竟論今治具校工拙有才不得  
施著書貽後世何必腰黃金自享千載貴鱸魚秋正熟

雲泉味尤美若逢吳市門更訪長生理

送姚彥經歌行

春風動地吹春去行人不肯江邊住  
片帆朝掛暮千里烟霞蒼茫宿何處  
聞君少年日射策明光宮同時得意  
三百輩上林曾醉桃花紅十餘年間事  
超忽幾在青雲幾白屋君雖未甚榮亦足有餘樂  
存心不負聖與賢何須畫影凌烟閣  
潯陽城頭古樓壯邂逅相逢觀瀛漲  
魚龍奔走勢莫分却憶當時兵火愁殺人  
至今戰場無綠

草冤魂夜哭寒蟾老臨風漉酒一弔之而我浮生何足  
道聊為君行歌數聲青山截斷江流平晴雲相對似能  
舞野鳥好語如吹笙却把閒愁付滄海身雖離異交無  
改若訪蓬萊王母家為攀琪樹遙相待

桃源行寄張兵部

武陵溪上青春暮昔人傳有桃源路時見落花隨水流  
咫尺神仙杳難遇神仙有無何可量但愛武陵山水強  
松烟竹霧水村暗鳥啼猿嘯花雨香車輪不來塵坌絕

日月自與乾坤長聞君取身欲長往禾熟良田給春釀  
陶然一醉萬事休還我天真了無象生胡為榮死奚感  
為笑紛紛避秦客一身千歲何足論更向漁家寄消息  
闕  
冥神交兩相許倒提金斗傾濁醪  
滴瀝招魂寂無語斜陽銜山暝潮退兩兩漁舟迷向背  
便欲因之垂釣竿六鼇一擲天門外

### 九華山行

羣山秀色堆寒空九華一簇青芙蓉誰云九子化為石

聚頭論道扶天公深巖自積太古雪燭龍縮爪羞無功  
湍流萬丈射碧落此源直與銀河通塵埃一點入不得  
烟霧五色朝陽烘有時昏昏雷電怒崩崖裂壁揮長松  
龍作雨虎嘯風白日變明晦九子亦慘容褐冠釋氏胡  
為笑傲于其中我將學彼術卷舌闕求童蒙天公信

玉女號令不爾從嗟爾九子竟何補非泰非華非衡嵩  
廬山三峽石橋行

銀河源源天上流新秋織女望牽牛洪波欲渡渡不得



此鵲為橋誠拙謀胡不見廬山三峽水此源亦接明河  
底擘崖裂嶂何其雄崩雷泄雲勢披靡飛鳥難過虎豹  
愁四時白雪吹不收燭龍此地無行迹六月游子披貂  
裘誰將巨斧鑿大石突兀長橋跨蒼壁行車走馬安如  
山下視龍門任淙激寄言牛女勿相疑地下神工尤更  
奇喚取河邊作橋棟一年不必一佳期

谷簾水行

嶄嶄青壑仙人居水精簾掛光浮浮

音扶

中有天樂振天

響真珠琤淙碎珊瑚嫦娥擁月夜相照天光地瑩倒玉  
壺又云玉皇醉玉液瓊簾千尺從空鋪卧來北斗諫以  
起驚風吹落青山隅溶溶萬古萬萬古竟誰能辨為真  
虛我來吟哦不知晚山雲四暗山魘呼安得長鯨駕天  
險下眎靈源知有無

鸚鵡洲行

猛虎磨牙齒九州禍生何事來掀廠黃雲屯屯宴賓客  
故衣脫去更岑牟漁陽摻撾曲聲苦壯士銜悲寂無語

漢朝社稷四百年海瀉濤淙一盃土嗟哉鼓史狂而癡  
天運往矣安能追四方血戰殊未已三赤稅杖真何為  
君不見武昌之國鸚鵡洲至今芳草含春愁可行則行  
止則止死無所益令人羞死無所益令人羞黃祖曹公  
均一丘

### 金山行

金山杳在滄溟中雪崖冰柱浮仙宮乾坤扶持自今古  
日月髣髴躔西東我泛靈槎出塵世搜索異境窺神功

一朝登臨重歎息四時想像何其雄捲簾夜閣挂北斗  
大鯨駕浪吹長空舟摧岸斷豈足數往往霹靂挺蛟龍  
寒蟾八月蕩瑤海秋光上下磨青銅鳥飛不盡暮天碧  
漁歌忽斷蘆花風蓬萊久聞未成往壯觀絕致遙應同  
潮生潮落夜還曉物與數會誰能窮百年形影浪自苦  
便欲此地安微躬白雲南來入我望又起歸興隨征鴻

潛山行

笑別姑熟州來作潛山遊潛山聞名三十載寫望可以

銷吾憂晴雲如綿掛寒木廣溪鏡靜涵明秋山頭石齒  
夜璨璨疑是太古之雪吹不收信哉帝祖駐鑾蹕異景  
怪變誰能求若非青崖見白鹿安得此地排珠樓羣仙  
長哦空洞絕綠章封事乘虛輒靈鳥盤旋老鶴舞華燈  
散采祥飈浮噫吁嚱漢武登壇求不得明皇夜夢推五  
百寧知司命抱真符為宋真人開社稷詔書數下脩琳  
宮殿閣縹緲平諸峯六朝德澤施愈遠九天福祐來無  
窮君不見潛山之下潛水之涯菖蒲有九節白朮多紫

花採之百拜獻君壽陛下盛德如重華

山中吟

山中吟白日長碧霄春暖菖蒲香仙翁勸我採為食登  
高遂覺足力强登高望遠遠思發春風浩浩天茫茫美  
人一別隔滄海青鳥寄與雙明璫青鳥東飛亦不返草  
色綠縹雲徜徉草色幾回綠雲飛無故鄉魂迷夢斷意  
何在山中吟白日長

山中樂

尋山佳興發一夜渡江月首到廬江元放家水洞清光  
數毫髮愛之便欲久棲息又聞靈仙之境敞金闕清風  
吹我衣不覺過皖溪危梁千步玉虹卧松行十里青龍  
歸烟霞繞脚變明晦忽見殿閣鋪琉璃重簷却在迴漢  
上倚欄俯眎白日低虛庭自作簫籟響屋角更無飛鳥  
飛霓幡重重蔽真御髣髴遙見星文垂長廊紗籠絕筆  
畫老龜穩載青瑤碑更逢逍遙不死客齒清髮翠桃花  
肌蕭臺可到亦非遠雲間况有白鹿騎細窺絕景輒大

笑吾曹何事塵中為安得良田三百畝可以飽我妻與  
兒長年只在名山裏萬事紛紛都不知

將歸行

男兒四十無所成可憐鬢髮霜華生長書朝奏夕命相  
此事故非言不行低徊却入邵陵幕梅嶺招降建城郭  
論功第一遭衆讒斷木浮沈委溝壑噫吁嚱數奇不獨  
李將軍株坐桐鄉三見春桐鄉雖好大兒死風物滿眼  
唯悲辛邇來又赴肥上辟碌碌隨人亦何益法網深懸



無縱鱗斂翼饑禽憂彈射噫吁嚱一寸丹心不堪折扁  
舟却憶姑溪月溪如凝冰月如雪天地清光迴交澈釣  
絲千丈入琉璃六鼇一舉三山隨人生快意莫如此腰  
束黃金多橫死君不見日暮途窮逆行客一餉榮華速  
誅殛又不見都市朝衣就劍人誰道忠言能殺身休休  
休歸去來芝田石室雲長在瑤草琪花春不回收帆銀  
濤即平陸跨青牛兮驅白鹿莫向人間歧路行豈有悲  
歡與榮辱休休休歸去來計已決肯學腐儒空有言辜

負春鵲口流血

東林行

龍蟠大地藏山腹瑞氣蒙籠紫金屋香爐萬丈擎碧霄  
二澗斜飛落寒玉晉朝遺事唐人辭敝斲龜螭尚堪讀  
樓煩真人應夢來夜斧丁丁神伐木安帝親留步輦迎  
靈蓮開池素華馥會隨流轉不成塵燈焰明明自相續  
遊人未達此理元安得清涼滅貪欲我今棄官脫塵網  
僧寶瞻依無不足跨黃牛騎白鹿時時自唱無生曲無

生曲君試聽五音六律和不得為君寫作東林行

圓通行簡慎禪師

廬山之西形勝聚無位真人依位住地祇掣鎖金城開  
石龍噴水銀潢注峯巒約勒萬馬回杉松自作千兵護  
寶殿崢嶸跨碧霄圓容麗服微西顧江南妃子親施田  
香飯供僧無億數法焰相傳十二人師泛鐵船揚子渡  
揚子渡秋風高霹靂駕雪翻驚濤中有漁家妙絕手一  
釣三山連六鼇縱時大地悉震恐收來塵刹無纖毫當

年曾許心莫逆今朝又作圓通客挂冠已脫塵垢緣一  
心願住清涼國清涼之國誰能知日長馬倦人多迷從  
來聞說曹溪路只今蹋斷廬山西

韶石行

扁舟未下連虞灘韶石羅列誰雕刊化工有意露怪變  
待彼虞舜來觀翫泊舟登岸始遠覽兩峯直裂諸峯巒  
青鸞低徊欲下飲翠鳳却舞搏脩翰蟄龍鑠雷怒奮角  
帝子出震初裁冠日光撲撲散金蘂蓮花透澈琉璃盤

行衣十里仙霧濕暝色一抹輕綃寒我將仙崖想韶樂  
北風忽變陰漫漫松搖長空吼萬壑溪走石脚淙驚湍  
遺音自與天地響聽不以耳精神完重瞳一去無復還  
隨風波兮陟雲間瀟湘洞庭亦何有竹上血淚千年斑  
九成不作至道息紛紛後世疇能攀登韶石兮情飄飄  
而未盡飭彼柴車兮且將造乎蒼梧九疑之深山

青山集卷二

欽定四庫全書

青山集卷三

宋 郭祥正 撰

歌行

姑熟堂歌贈朱太守

姑熟太守真賢豪  
洗滌弊垢明官曹  
民間吏竦郡無事  
華堂新構臨江皋  
朱簷斜飛傍星漢  
碧瓦不動蟠鯨鼇  
釀成玉液宴賓從  
手提大筆降風騷  
四時景物換耳目  
萬古治亂評秋毫  
嗟予末坐重感激  
胷中茅塞時耘薅

山雞卑栖竟何取豈合鸞鳳返翔翱紫萼葳蕤味正美  
鮮鱗玉縷鳴霜刀為公一飲直醉倒坐看萬室皆陶陶  
誰云江南地偏小姑熟之堂天下少丹湖千里浸城東  
蒲葦藏烟春渺渺牛渚對峙凌歌臺長江倒掛天門開  
風吹玉烏億萬足漢兵卷甲沙場迴有時浪止皓月滿  
琉璃宇宙無纖埃帆檣隱隱鳥飛沒漁歌細下天邊來  
謝元暉李太白一生好作江南客至今遺恨人不知孤  
雲尚鎖青山宅請公漉酒一弔之聽我長吟壯靈魄人



世百年能幾何高會難逢離別多一朝公去調鼎鼎斯  
堂永作甘棠歌

宣詔廳歌贈朱太守

使君心畫天下無構廳宣詔西南隅曉光初散射簷桷  
夜氣欲合吞江湖覽甃摩挲滑瑤玉重窓窈窕明青朱  
胡生畫手出前輩素壁為寫巫山圖一條江練澄碧落  
十二峯色裁珊瑚元猿老虎嘯髣髴長松瘦石寒扶疎  
中間皓鶴最恬淡九霄獨立形神孤君去班春勸耕稼

君歸命客同歡娛三冬垂簾醉春筇六月靜坐臨冰壺  
已牋血色灑醉筆五字七字排璣珠和風匝地怨氣滅  
險吏縮手窮氓蘇地隨人盛古今好姑熟自此為名區  
君不見滕王閣庾公樓樽罍千載誇風流又不見宴寢  
一詩尚不滅至今人道韋蘇州噫吁嚱四座勿歌聽我  
歌宣詔之名君謂何守臣不壅帝王澤六合長靜無干  
戈

濟源草堂歌贈傅欽之學士

秀氣鴻濛濟州曲十歌清池萬竿竹竹裏修椽架草堂  
不羨長安買華屋春生廣野碧玉柔月擁翠嵐銀粉撲  
低飛白鷺揀晴沙聞曉黃鸝轉喬木明明長劍倚太行  
拂拂愁烟蔽盤谷重岡漸遠勢愈高雲開青出分秋毫  
龍蛇鱗甲雪霜洗壯士四顧空提刀陰晴萬變恣吟寫  
三疊琴聲猿夜啼君不見古來功名輸隱叟種桃採芝  
皆皓首不將機械攪靈源能使形骸頗長久明公何年  
歸草堂扁舟我即浮滄浪江魚有味四時美一蓑醉臨

蘆花傍男兒彼此送終畢自算此身無得失江東片月  
過河陽為照兩處無何鄉

寄題蘄州涵輝閣呈太守章子平集賢

讀君涵輝記恍若登蓬萊天垂星斗數尋近地卷雲山  
千里來冰壺倒景露華洗玉竇溶雪蟾光顏塵寰何處  
路岐絕三十六洞森然開武夷真孫佩符印選勝得此  
將金壘文章欲會造化手藩屏暫屈巖廊材謝公寄意  
東山妓嚴生把釣桐廬臺功名談笑出千古長與泰華

青崔嵬其餘齷齪何足數百年易得成寒灰為君高吟  
豈知倦十分美酒誰相陪我欲乘風二飛往病翅零落  
秋霜推涵輝閣寧久游重瞳法堯垂冕旒側聞下詔十  
六相真孫第一還瀛洲

宣州雙溪閣夜宴呈太守余光祿

陵陽三峯壓千里百尺危樓勢相倚海波不動蛟龍盤  
疊玉無塵霜雪洗溪光冷浥山光潤色接金陵古名郡  
青猿嘯斷四五聲白鳥歸飛兩三陣四時之景皆可觀

六月來遊膚髮寒有時下瞰北山雨只道林林銀竹竿  
賢哉光祿余太守昨引佳賓列樽酒朝飲三百杯暮吟  
三百首不為陰慘嚴刑誅長吐陽春活殘朽御史曾書  
治績碑州人盡祝靈椿壽沈沈羅幕更漏稀燈如撒星  
公醉歸絲篴前引後鼓輦珠履交錯行遲遲丈夫得意  
不為樂借問百年能幾時

寄題洪州潘延之家園清逸樓

南昌城中潘令宅清逸樓高二千赤斜飛四角河漢躔

密排萬瓦鴛鴦碧樓中至樂無人知掃盡寰區別名迹  
霜華吹月雁橫空湖水浸天秋一色橈聲斷漁歌起西  
山却在蘆花裏行客紛紛嗟白頭纓塵不解滄浪洗愛  
君年少先拂衣古人歸去無今時上有明明垂衣之堯  
舜下有錯落戴主之咎夔涅中不用一簫取繚繞驛道  
通健為更看牧馬天山草漂心雪恥幽燕兒朝廷大業  
昔未有志士獨往吾何譏陶彭澤阮步兵回首晉道方  
飄零絲桐欲彈悲思盈豈如潘令逢昇平倚欄一醉絃

索鳴紅綃燃蜜爛華星玉人舞徹東方明

寄題德興余氏聚遠亭

暗空風卷浮雲落萬里秋毫瑩寥廓  
垣娥泛月中夜來撲撲山川銀紛薄  
天垂斗柄掛簾鉤地接明河浸欄角  
誰傾世界入冰壺滉滉仙春迷海嶽  
嗟予南望未能往小宰塵勞真齷齪  
感君寄我羣公篇覽記方驚子先作  
詞源奔激吼波濤筆畫縱橫挫矛槩  
構名措意豈徒然景物化為仁智學  
丈人教子惇義方宴息時來命樽酌



何當勇起挈扁舟夢寐思陪衆賓樂

留題潛山山谷寺

山如連環不可解玉溜穿崖鯨尾擺中天化出清涼宮  
汗漫琉璃翠光灑回頭無路通人間毛髮森森神魄駭  
長碑突兀壓巨鼇字刻雄文入模楷乃知梁僧挈刀尺  
來此幽棲聊脫屣地祇掣鑊巖戶開縱有堆金豈能買  
梁祖傳衣當第三至今異骨藏斯巖我朝重賜七寶塔  
舍利感應符至誠誰曾磨崖記名姓習之健筆深鐫鐫

盤龍鉞鱗想風槩雲霧慘淡遮松杉至寶不獨世所惜  
定有山鬼長扃監願借雷公霹靂斧堅珉斫斷載以函  
高僧邀我恐忘返虎豹堪驚日將晚歸來拂榻坐虛堂  
軟煮黃菁薦香飯千年遺迹安足誇幻妄非真生有涯  
柰何吾勢未能已夢想長在金仙家

留題九江劉秀才西亭

西臨大江南瞰  
廬阜北見四祖

南出九江城西下五老岡條然一徑二三里流水散漫  
桃花香桃花迴環蔽深屋犬吠遊人人扣竹青衣借問

來何為正是劉郎春酒熟劉郎不厭客撫掌邀我曹西  
亭有榻醉可卧下臨大江萬頃之洪濤長帆出沒送孤  
鳥月飛不過哀猿啼更愛雙劍峯正落南窓外天公好  
仁不用武太古光鋌未磨淬誰懷邪佞心見之膽應碎  
淮山在天末寒青亦相對微風時一來松栢搖蒼珮頃  
刻神官驅黑龍泓泓興雲變明晦地勢雖高直可驚酒  
行且止曷休嘷劉郎顧我笑為言向苦悲陰晴非汝職  
不醉將疇歸歸來乎頻相過西亭把酒共君歌

留題西林寺攬秀亭

李公擇學士命名云李白有九江秀色可攬結吾將

此地巢雲  
松之句

行瞻香爐峯未出二林口一區廣地如席平誰作新亭  
名攬秀秀色可攬結正對香爐峯李白愛之忍去去便  
欲此地巢雲松寂寥往事三百載澗泉谷草依舊揚清  
風泉可掬草可擷清風灑面如冰雪間來攜手四五人  
倒盡金壺頰不熱寸心何獨忘寵榮形骸遺盡神超越  
寄語世上士勸君早歸來霹靂轟車膽欲落忠憤雖死

何為哉此時竟不悟此心徒自知嵐光向晚紫翠滴杜鵑更在深林啼試拂橫琴奏流水指下忽作商聲悲悲來乎可奈何推琴罷酒為君歌

武溪深呈廣帥蔣修撰

滔滔武溪一何深源源不斷來從郴流到瀧頭聲百變誰將玉笛傳餘音潺潺泠泠兮可以冰人心胡為其氣兮能毒淫漢兵卷甲未得渡飛鳶跼跼墮且沈天乎此水力可任蠻血安足腥吾鐔功名難成壯心恥馬革裹

尸亦徒爾伏波一去已千年古像蕭蕭篁竹裏風來尚  
作笛韻悲宛轉悠揚逐船尾如今天子治文明柔遠懷  
憶昌黎氏始末緣何不相類能言佛骨本無靈可惜咨  
嗟問瀧吏湘妃之碑尤近怪頗學女巫專自媚固當褒  
馬聊黥韓湘妃之碑尤近怪頗學女巫專自媚固當褒  
馬聊黥韓補葺須令賢者備元戎喜遇蓬瀛仙武夷探  
古傳新篇東君吁嘻龍蜃走北斗挹酌河漢懸勸君莫  
倚隴笛之悲音些勸君清歌兮投玉琴些琴聲為出堯

舜心堯舜愛民無遠邇君不見薰風來自南些

松門阻風望廬山有懷李白

北風阻船泊湖濤北望廬阜青無痕晴雲自舒仍自卷  
白龍欲眠猶宛轉秋空漠漠秋氣淺碧天蘸水如刀剪  
篙師畏浪不敢行却憶李白騎長鯨倒回玉鞭擊鯨尾  
錦袍濺雪洪濤裏霓光溢目精神閒終日高歌去復還  
飛流直下三千尺風吹銀漢落人間天送醇醪傾北斗  
羣仙吹簫龍鳳吼李白一飲還一醉醉來豈知生死累

倏然却返玉皇家不騎鯨魚駕鸞車留連自摘蟠桃花  
嚼花吐津染朝霞不信如今三百載頑鯨駭浪空相待

苦寒行二首

江南饒暖衣絺綌今歲春寒人未識溪流冰合地成折  
一月三旬雪三尺去年大潦民無食子母生離空歎息  
只今道路多橫屍安忍催科更誅殛

下溪捕魚一丈冰上山採樵三尺雪人人饑餓衣裳單  
骨月相看眼流血乾坤失色雲未收鵬鶚無聲翅將折



官倉斗米餘百金願見春回二三月

武夷行寄劉侍郎

平生愛山水最聞武夷好千峯巒嵒月倒掛萬木陰森  
春不老羣仙浮舟出寥廓未濟明河半空泊世人可見  
不可攀靜夜天風吹寶樂須信仙家日月長塵埃下土  
空茫茫賢愚得失竟何益坐看綠髮催秋霜人感感悟  
有誰早丈人尋真歸故鄉故鄉宅在武夷址山勢迴環  
碧城起仙基一局一番春幾見桃花滿流水他年功成

趨帝闕醉喚常娥擁明月照開三十六洞天玉樹瑤花  
恣攀折文人之樂其無央我今欲往親在堂側身南望  
未能到耿耿寸心思夢長

青山集卷三

欽定四庫全書

青山集卷四

宋 郭祥正 撰

五言古詩

游仙一十九首

漠漠出寒霧悠悠趨太清  
珠樓被重綃靈花紛素馨  
青衣捧綠章磨丹書姓名  
為我橫玉笛一奏雌龍聲

非塵復非烟氤氲散紫清  
乃知冷風御脩脩恣游行  
忽逢黃金闕云是玉帝京  
逍遙侍御者不假精銳兵

扶桑并咸池宵宵殊在下真陽涵素光無晝亦無夜神  
體當自保不與物俱化運齡從此長塵緣頓消謝

至道不由學頽齡安可住宿命無纖羅重玄乃遐悟鮮  
明女蘿裙致我火澣布稽首存至誠欣會如所度

至音非樂音玲瓏聞自然殊絕洞房景亦超鬱羅天靈  
嬪下鶴馭問我來何緣却驚與世隔一別三千年

澡心華池液薰手玉樓香一披寶神經衆真共來翔七  
言詠良遇至音迭琅琅珍重衛夫人行草記瑤章

太微無烈風紫臺多靈露逍遙三五客披衣縱高步回首笑復歌游此今幾度却嗟寰中人枉為死所誤

仙家無四時瑤草常芬芳五嶽條來爾玉鞭驅鳳凰得道迭相度不聞嫉賢良所以心無邪人人自年長

妙景素無雜玉界涵虛明妙聲清不淫洞歌奏金鈴真遇非遐想忘心乃全生噫哉百年內得失安足營

峩峩金積巾飄飄清霞裙手持紫毛節身乘三素雲駕言欲何適上朝玉宸君隱書謝所賜洞明道之根

翛然乘一氣來往游太空閒歌內景章遂登藥珠宮華  
英不知名激齒甘液濃此樂無憂繫固非侯與公

投真落人世倏經四九年覩紛未嘗競內顧淨且淵果  
逢飛行羽得披紫微仙攜手浮絳波絳波春渺然

攀沿日月窟遂觀天地樞搗金鑄豪英搏糟醞庸愚校  
量宿所造報應無差銖丁寧與世言安分勿浪圖

在天不擇友天人皆正一雲漢共翱翔隱耀無固必豈  
同濁世游自謂膠投漆毫端利害分白眼永相失

款逢九華妃授我磨鏡石一磨日月朗萬古永不蝕  
絨之紫錦囊匪同趙氏璧纔落猛士手睨柱曾莫惜  
二景結良匹曾非塵慮侵欣欣啓皓齒玉珮揚清音碧  
河并絳實採濯期追尋言舒意亦散雙好永齊心  
神凝光自生洞房玄照映青絲散垂腰目采流玉鏡共  
談上清事精微寄餘詠樂酣會既分雙駕還霄嶺  
清僚真可慕振衣願所歸既絕世上緣吾寧抱愁悲雲  
韶自相諧虛聽方達微是將跨靈羽逸麟復攀追

窺天見天根步玄入玄門素光流一氣默默復渾渾揮  
手散餘景至心揖靈尊從今乃忘言大道多子孫

春日獨酌一十首

桃花不解飲向我如情親迎風更低昂狂殺對酒人桃  
無十日花人無百歲身竟須醒復醉不負花上春

江草綠未齊林花飛已亂霽景殊可樂陰雲幸飄散且  
致百斛酒醉倒落花畔

平生最嗜酒况復就花飲明月正照人吳姬安得寢更



起盡餘杯擊碎珊瑚枕

芳華無十日自勸頻舉盃素髮易凋落青春難再來  
林間黃鳥囀日下浮雲開吳歌梁塵飛越舞白雪回英雄  
既長往珠金安在哉僅存一丘土石麟卧蒿萊誰曾將  
濁酒為君傾夜臺

醉去卧蘭茝安用張蜀錦何必黃金盃癭杓亦足飲  
物理不可齊好惡乃天稟真精既洞達空無仍諦審所以  
陶淵明北窓自欹枕起作無絃彈此音殊妙甚

雷聲散陽氣晴景醉長天綠從何處來染我山下泉汲  
泉釀醇酒舉盃復頽然寄謝伯夷輩餓名安用傳

春日何遲遲萬物涵陽暉君看源上桃並蒂花滿枝雙  
雙梁間燕營巢知所歸凌霄附長松託根亦有依餘生  
如不飲無以謝芳菲

不羞雙鬢雪折花向林間念此光景速未能身世閒滿  
酌金罍斗遙望謝公山跡欲扁舟渡心先高鳥還今朝  
不酩酊何以破愁顏

幾日待春光春光易衰歇流年信密移誰能保肌髮何  
須秉蠟炬今夕值明月但願海變酒拍浮長出沒歸來  
歸去來蓬山有仙闕

海棠微雨濕枝上殘紅泣山鳥啼向人春光一何急濁  
酒注我腸免使新愁入却欲買扁舟漁竿荷蓑笠

田家四時

田田時雨足鞭牛務深耕選種隨土宜播擲糯與粳條  
桑去蠹枝柔柔待春榮春事不可緩春鳥亦已鳴

麻麥聞熟刈蠶成繰莫遲更看田中禾莨莠時去之幸  
此赤日長農事豈敢違願言一歲稔不受三冬饑

開塍放餘水經霜穀將實更黎原上疇坎麥亦云畢老  
叟呼兒童敲林收橡栗乃知田家勤卒歲無閒日

田事今云休官輸亦已足刈禾既盈困採薪又盈屋牛  
羊各蕃衍御冬多旨蓄何以介眉壽甕中酒新熟

朝登北山頭二首

朝登北山頭千里入平望本欲寄吾懷胡為返惆悵晴

雲隨白日西去沒青嶂素絲行滿頭吾年安可壯  
朝登北山頭悠悠望江水水流無還期人老行已矣勸  
君把一樽聊用置悲喜生無死何有原終乃知始

感春二首

高枝花自舞低枝花自笑上有濃露濯下有清溪照開  
落十日間誰識春工妙一杯亦頽然獨醒時所誚  
盜盜酒盃綠披披花萼笑雖無同心客幸有白日照趨  
時性已拙悲歌聲不妙素髮未能歸猿鳥應相誚

同阮時中秀才食笋二首

蒼崖長龍孫頭角露已甚呼丁恣庖割移榻就濃蔭  
恍疑羽林槍羅列在紫禁餘鞭橫瘦蛇密籜若紉紵  
亭亭風勢勻節節泉脈沁藩垣謹藏護寧使暴客闖烹調  
衆云美剪伐吾亦任繞齒嚼冰漸毛髮寒以漑閒心本猿  
鳥世詠嗟毒鳩野逸誰所憐愁思腸胃滲詩才君獨勇  
辨舌予久噤酒行且莫辭醉膽滄溟浸况逢堯舜治面  
內來左衽熙熙冠蓋游落落飽食飲鸞鳳自橫飛燕雀

蒙廣廕徘徊食笋謠明發扁舟賃

予生本無羈縲為茲縣尹日長公事餘佳客車接軫入  
林安所食烹庖就肥笋森森蒼龍孫頭角遭束窘金刀  
僕爭割紫籜手親隕草火尤相宜狼藉亦殘忍聊為一  
餉樂得酒輒滿引喧呼棋屢勝慘淡詩不敏予腹既便  
便從君莞而哂

鵠奔亭

新江自南來西與端江匯屹然鵠奔亭遺意溢千載

化城寺清風亭

唐時升老亭剪棘今重開南瞻峨眉關北峙凌敲臺新  
公將家子為僧亦多才譬彼獨鶴唳安用羣雞猜或彈  
玉軫琴傾耳濯纖埃清風不知處凜冽時時來吹雲雲  
窈窕吹月月徘徊幽人許共賞渴心咀珍梅了然得真  
味塵魂自然摧令姪又豪俊書名駭奔雷禪談屢終夕  
茗酌無餘盃還歌太白篇事往良可哀古今儻同轍浩  
氣不成灰



懷友二首

夕陽在窓戶涼氣何處來微風泛庭柯蕭蕭歷空階抱  
琴一寫之冰霜濺孤懷但惜對樽酌而無良友偕聊將  
幽獨思滔滔寄長淮

晚坐庭樹下涼颼經我懷亦有樽中物佳人殊未來佳  
人隔重城誰復為之儕瞻雲雲行天步月月滿階想聞  
誦聲作崩騰瀉江淮

七月八日要閤公達承議晚酌二首

河橋散靈鵲曜景逾佳期池華延舒月尚可傾一卮欲  
以要良賓秋事言淒其歲往豈再得綠髮含霜滋寓意  
不在飲營駕君莫辭

營駕君莫辭寓飲不在酒得酒亦可喜話情庶延久鷺  
白不翳塵山光含美璞霞綺映池葩條蟬嘶露渥時平  
無橫平聲愁身退茲餘裕彈琴來薰風高軒良可佇

嚴氏西齋

立屋聚羣經執經授諸兒趨善務深畜言行韜前規譬

欲種嘉禾春膏力鋤犁一朝秀而實刈熟當如坻遂為  
道德飽用濟斯民饑庭木豈不美涼陰奉邀嬉池水豈  
不深濯熱臨清漪作止既可樂左右皆宜之瑤琴誰為  
彈倚聲奏吾詩

青山集卷四

欽定四庫全書

青山集卷五

宋 郭祥正 撰

五言古詩

安中尚書見招同諸公登雨華臺

城南五里近驅車稍停休層臺臨古剎欣陪清淨遊憑  
高送遠目考古思名流更讀琳琅篇叙事何其周尸黎  
與法雲接迹居巖幽趣將金仙諧行匪邪徑由至今手  
植松千丈騰龍虬悟發特異衆妙齡已依劉天華無根

帝應講來飛浮帝釋昔舉手此理誰可侔邇來表前蹤  
新亭壓鰲頭空渚栖古月大江浴清秋曠懷出十地壯  
氣橫九州三山連天門水府卧金牛故國羅綺滅深宮  
榛莽留興亡千歲間愁緒如縵抽惟餘北嶺雲無心自  
悠悠高鴻正飛冥網羅安得收公等真丈夫問學皆淵  
丘不應持使能歸合登瀛洲桓桓鼎鼐司落落金馬儔  
君臣若堯舜明良互賡酬胡為慕瞿眎玄微解而優願  
舒三日霖慰此旱歲求乾坤涵潤澤使我醉雨眸咄嗟

勿重陳玉樹後庭謳

送李嘉甫朝散還臺

春風連作惡吹雪深尺五元宵無燈火閉關與誰語忽  
聞營從過傾蓋挹眉宇相親如故人坐久加循撫蓬茅  
只數間餘無一丘土半俸足以飽未嘗詣州府白雲寓  
遠目清溪照靈腑趨閒已忘憂浩歌唯汲古名公志方  
壯富貴何可取協韻高才孰能當如羆亦如虎致君為唐  
虞澤民作霖雨功名垂乾坤兒孫列簪組予予一何遼

而能強相與聊書送行章欲以明出處

前春雪

玄冥奪春令連旬雪塞屋嗷嗷何物聲云是饑民哭來  
請義倉米奈何久空腹寒威如戈矛命盡須臾速憶昨  
去年水雲濤卷平陸高村既無麥低田又無穀民間已  
乏食租稅仍未足縣令欲逃責催科峻鞭朴嗟哉吾邦  
民何以保骨肉昂頭訴蒼蒼和氣待春育春工本好生  
此雪無乃酷誰家敝園館草樹變瓊玉美人學回風歡



笑列燈燭不如萬戶寒唯憂五更促世無採詩官悲歌  
寄鴻鵠

後春雪

前雪深尺五後雪深五尺動地北風惡連天凍雲塞通  
達絕行人萬物同一色燭龍爪生冰陽鳥觜插翼牛羊  
何足論虎豹餓無食此雪昔未有父老均歎息況當長  
養時玄冥翻怒赫我欲請雷車夜半轉霹靂斗杓斡春  
陽和氣隨甲析溶為大田水青發龍頭麥南民多蘇醒

白骨免堆積朝廷方體仁乾坤應合德有酒不敢飲獨  
樂神所責悲歌閉空屋寫慰同心客

送黃吉老察院

積學久未遇忠言今可施請君略細故吐出胸中奇悉  
救當世弊自結明主知不唯振憲綱進當司鼎彝用廣  
財已乏官冗人愈卑政寬法不舉將悞邊無威家家侈  
聲樂淳源變澆漓土木絢金碧佛仙競新祠此乃腹心  
疾豈止為瘡痍言者曾未及雖言多闕私苟非大奸邪

惡足求瑕玼舉朝無完人何以裨明時嘗讀喜似篇左  
右皆宜之乃知荆山璧天地終不道去至無變容誠明  
達神祇我方卧巖各所友鹿與麋感君營從過枯木春  
風吹人如得黃梁慰我久苦饑承詔不敢留歡言遽睽  
違殷勤何以報報君以蕪辭

和敦復留題池州弄水序

我寄江南隱數為弄水遊讀君弄水篇感慨攀巢由赤  
脚踏雲雨投竿翫汀洲鷗鳥不見猜飛舞相應酬誰傾

百斛珠跳躑無復杖一發海客祕爛副貧家求李杜縮  
光焰王謝慙風流開卷起予興飄欲乘桴浮如觀秋浦  
圖晚景入兩眸愛之不能捨饑魚適吞鈎嘗置几案間  
出沒窺巖幽一別幾何時歲月已十周跡滯若匣劍鏽  
澀不可抽何當隨君車吟哦與君侔

謝胡丞寄錫泉十瓶

怜我酷嗜茗遠分名山泉茲山固多錫泉味甘尤偏幸  
遇佳客便十缸附輕船開缸漱清冷不待同茗煎想君

民事休時時造泉邊入碾龍鳳碎浮甌乳花圓一啜未  
能止七盃誇玉川兩腋生清風飛逐蓬萊仙江心與谷  
簾較之孰為妍欲報吾子惠仍思陸生賢

謝魏戶曹惠酒

官醪不許買兵醞未嘗得愁殺避俗翁甘為獨醒客緣  
何魏夫子心仁生憫惻雙壺輒分送涸鱗被甘澤鐺杓  
再施設併欲醉君德百川供長虹叱吒天地窄儘從秋  
水來大笑問河伯胡為辨牛馬灩灩浮月魄

川漲

朱夏久不雨川源條然漲三潮渺相連狂風蹴高浪蛟  
龍遞出沒魚鼈隨浩蕩羣山悄低徊阡陌失背向嗟嗟  
圩中田一埂安可障去年已大潦十戶九凋喪幸賴官  
廩實囂囂命所仰官廩今已空農事未敢望理水竟無  
術祈禱俟靈貺退寸復進尺潮勢頗難量彼蒼罪斯民  
殺戮不以杖令人思禹功巍巍百王上

答魏掾招飲

我欲招魏子小山嘗白醪月華雖未滿已覺秋風高何  
物估樽酌肥鱸併蟹螯一飲洗百憂軒冕稍可逃此語  
未及發辱君先見要乃知志趣同盍簪皆俊僚亦應喚  
舞娥紅雲欲飛飄不然避謗傷談話傾漁樵期歸一酌  
酌世事如芭蕉

酬彭法曹留題小山用次來韵

讀君小山篇語勢欲飛舞乃知甘與賈年少心則古又  
如東山生用之必為虎予方坐空谷屏息避煩暑開緘

揖清風不覺生毛羽攜之出人間瑤池贈王母

送黃彥發還臺

予方寓小山感君忽相過風標奪瑩玉氣語排懸河君  
初佩金印治蠻真有科彼侮我即斬威行濟之和使知  
朝廷尊帖帖無慙訛聖主方求才四海張網羅麒麟并  
鳳凰所獲寧為多如君必見取為君吟菁莪

酬陳掾留題小山二首用次來韵

我愛小山石翩翩鸞鳳姿胡為不飛去似與幽人期志



澤未及物收身聊自嬉不教三徑荒寧歌吾意詞舊交  
安在哉歲晏逢子知殷勤結惠好琅玕分一枝

茲山何亭亭鬱有高人姿朝容白雲過夜與明月期幽  
蘭翠碧秀好鳥鳴聲嬉更逢佳客來惠好留美詞遂令  
一丘樂能垂千載知殷勤謝陳子蒹葭倚瓊枝

和陳掾效陶齋

君欲效陶潛超然異今趣開齋即吾廬欣欣同所慕潛  
魚不羣游栖鳥不返顧無意亦無我何思復何慮遂趨

羲皇上日息自休  
裕百年能幾何  
不知歲云暮  
終當隨白雲悠悠此山去

喜鍾山泉禪師見過

聞師飛錫來  
七日遠葷飲  
欣諧清淨談  
中夜未能寢  
師提寶公刀  
為我裁古錦  
言歸不須忙  
溪上冰雪凜

送魏掾赴調

齟齬已承祿  
資賦况超邁  
三年瑩無疵  
一日欣有代  
芳洲清風微  
夕浦寒烟靄  
翩翩莫能留  
逡巡遠山外  
浮生

離合際志士懷耿介渺思歲月往俯眎天壤隘人驚甘  
羅少帝憶賈生對竟言若為期充實光輝大

送喻明仲朝請還臺

出馳使者星歲月一何久巨航始北歸華髮已盈首讀  
書過五車滿腹藏瓊玖行行赴金闕朝帝見太后乾坤  
運元氣斟酌須北斗願如范文正上疏發續黈明明納  
忠諫聖作古無有道行且寄書慰我窮老叟

送倪敦復朝奉還臺

有力乃致遠中道力不任言歸閉空屋敢復求知音君  
來監郡務猥卷一見臨稱褒借陽春片礫成寸金觴酌  
每追隨嘯詠舒悰襟不覺三歲過啟櫂離江南協韻君懷  
有玉寶未嘗獻于今不往獻千歲惜湮沈流沈流景良  
可悲鬚雪來侵侵前途漸就窄後會安可尋屋梁見落  
月殷憂存我心猶期澤萬物霈然作商霖

邀敦復小酌為別

三年同賞梅梅花爛晴雪一日言北歸梅黃雨初歇誰

將金彈九綴在綠枝上結實勝開花邀君更同賞食梅  
齒牙軟銜盃奈離憂過江桃李熟回首憶梅不

送楊縝供備還京

伯玉弘農侯欣欣真丈夫首雖我武弁滿腹藏詩書三  
年監郡兵一日云解符考之閭井言公廉卒如初未嘗  
害一物縱舍乃有餘我方卧空屋坦跣與世疎感君數  
相過晨坐定及晡新詩并美酒問遺無時無老境重可  
惜遠別復何如美君五福全客官奚拘拘子孫俱祿仕

京城富園閭精神趁强健優游早懸車祝君可以歸為  
君吟歸歟

聽惠守錢承議談羅浮山因以贈之

久憶觀滄海喜君語羅浮浮從會稽來與羅相獻酬誰  
欲通兩山鐵橋跨山頭笙簫響瑤臺佛仙棲石樓靈光  
燭商舶七星被林幽飛泉難悉名異草香氣柔危峯聚  
白鹿深塢眠青牛葛洪安期生遺蹤尚綢繆攀巔瞰海  
水湛碧纔一甌不見波濤翻颶風駕龍虬又云朱明天

飄然落遐陬方廣吞五嶽盤紆臨十洲不得預封禪自  
起烟雲羞此理固莫測勝境輸君遊君語洗我耳我請  
瑩君眸羅浮杳何許為我商聲謳

送錢節七承議還臺

平昔未識面已景才業殊及來公詡家把酒情忻如分  
攜八換歲益聞峻名譽我方姑孰隱君解惠國符鷁舟  
始云泊駕言過茅廬傾談洗塵聽積憂令我舒鳳巢無  
凡毛龍窟多美珠朝家正清明往矣涉亨衢澤民冀姚

宋致主優唐虞史筆採循吏非君復誰書


自釋二首

去日不可追來日已無多衰頹復自念遷謝當奈何賢  
達并賤愚百歲同消磨不如泳觴酌徘徊眄庭柯流翠  
自成幄好風時經過憎愛理兼忘虛淡神所和運盡即  
隨盡葬骨南山陂

遭時如堯舜擊壤歡且歌歸田尚叨祿天寵固已多敢  
復邀長年寓景隨流波有酒即觴酌風日春清和俯悲



秦晉士含饑避干戈



青山集卷五

欽定四庫全書

集部

青山集卷六至

十

詳校官中書

臣閔思毅

侍讀臣孫球覆勘

覆校官博士

臣

劉光第

校對官中書

臣

王璵

謄錄監生

臣

藍嘉璐

欽定四庫全書

青山集卷六

宋 郭祥正 撰

五言古詩

志士吟二首

羣材

一作士

欣向榮志士寂無託獨鳥千里飛天末孤雲

泊越女殊西子秦聲異別鶴守貞不辭貧怡怡內常樂

高歌戛金玉其聲震寥廓

歲華忽已晚志士將奈何推車眷前修停澤無餘波知

命守窮賤脫屣南山阿出從麋鹿遊坐與猿鳥歌采菊  
復采薇聊以養天和

聞砧

天潢轉斜白庭菊汎團露紈扇辭玉纖雲幄含幽素濕  
螢遞疎牖寒螢鳴外戶南鄰發砧響涼夕敢虛度不作  
舞衣裳為君理繒絮邊磧多苦寒先秋寄征戍

秋扇

輕素裁團扇投君掌握中為君却煩暑動搖挹涼風一

朝霜飈至羅幃衾被重辭君且屏跡棄置隨斷蓬物理  
古如此用捨安可窮願君千萬壽執熱還相逢

賞蓮

濯濯水中華香艷勝蘋藻英英泥中根絜素常自保房  
食又堪食無一不為好乃知金仙經譬喻肆論討游焉  
集賓僚賞詠固宜早一朝霜飈至莖葉變枯槁抑亦如  
佳人妍媚忽衰老顧眄豈復憐棄置不足道幽懷向君  
開芳樽為傾倒木末誰能摹愁烟起孤島

將至金陵謁曾子開侍郎

秋空久不雨漠漠風卷沙胡為起高興昨夜辭山家明  
投金陵郭府觀凌紫霞公解豫章榻我停銀漢槎一傾  
別後言電電鳴交加借公口中春發我枝上花又如出  
地雷空山走龍蛇公能結明主我亦思無邪但驚歧路  
別進退各有涯浮生能幾時鬢髮忽已華會合豈易得  
兵厨酒仍佳慎勿學謝安捫涕空感嗟

雙泉軒贈太平守梁正叔

開池得雙泉因泉構華屋池中種菱荇池上列花竹與  
春蘼新紅遇風搖淨綠輕鷗自飛舞纖鱗隨出縮操舟  
往江海端憂龍蜃觸卷衣入山林而防虎狼欲豈如一  
憑欄俯仰快心目朝吟吟有餘暮醉醉不足雙泉長涓  
涓比公享天祿公歸民懷公聽我雙泉曲

徐子美楊君倚李元翰小酌言舊

南方多苦熱北地尤苦寒徐子掾招宜七載濱夷蠻楊  
李仕并代毳裘霜雪殘一朝相續歸相看涕洟瀾捫涕



喚家僮草草羅杯盤念昔共庠序垂髫競癡頑及今過  
六十各各嗟衰顏光陰信如馳生死無百年妻兒半凋  
喪少喜多憂患吾方慕陶潛行歌眷南山山氣日夕佳  
吾廬未嘗關猿鳥相與居絲桐時一彈三子方急祿遑  
遑未能閒努力佐州縣須防官長難暫當陪我醉餘事  
不足言

寄題九江陶子駿佚老堂

未老已先佚構堂名佚老與其寵辱驚何似歸未早淵

明乃吾祖此道能自保歸來無一事時時為酒惱紙帳  
春風融不寐聽春鳥關關枝上語報我竹間曉我醉未  
能起爾音一何好却笑世間人忘憂種萱草

復雪

連朝雪復雪吾獨擁紅爐樽中亦有酒不為饑寒驅目  
前奚所憂所憂在村墟去年旱兼水二稅多逃逋十家  
九乏食往往死路衢空山嗥虎豹深淵卧龍魚飛鳥各  
斂翼康莊斷行車倚門獨悲歌陽氣何時舒

將至壽陽謁朱行中龍圖作

魏臺公送我春風花落盡壽陽我訪公蕭蕭朔風緊且  
復念殘年鬢髮安得鬢高才久外補惠受益不泯聊歌  
古柏行歌罷仰天哂長淮白魚肥冰壺酒堪引

暮春之月謁廬守陳元興待制作

百年憫秋霜念念流運歇一昨辭周行于今鬢垂雪幽  
獨誰為扶寸心徒自折翻然駕柴車賓閣重款謁與公  
論襟期及此陽春月英英欄中花滋露正妍發濁濁瓦

中醪浮醅想芬冽朝廷用直道郡邑罕所闕  
嫵婉我之友皎若環與珎良辰不同樂衰暮空惜別

廬陵樂府十首

妾擡纖纖手一拂白玉琴琴聲寫三疊寄妾萬里心  
朱絃斷可續妾心常不足纔驚楓葉丹又見楊枝綠望君  
君未到妾貌寧長好雲鬢懶重梳從教似秋草

鴻雁殊未來思君一彈琴泠泠別鶴語折盡幽蘭心  
蛛絲漫相續難繫驂騑足白日無時停雲鬢寧長綠年華

要不老不若丹青好對之雖無言猶勝種萱草

與子初執手效彼瑟與琴子去既不返誰復知我心  
寶刀能切玉願斷金烏足留住枝上春花紅葉長綠  
懊惱復懊惱憔悴變妍好不見庭中蘭埋沒隨百草

妾身厭塵埃專心託君子感君一面眇涸轍逢秋水  
雍容未經年結誓同生死胡為忽言別短書無一紙愁  
思魂夢飛鵲語不成喜歲晚君不來紅妝為君洗

嵯峨姑射山綽約飛行子絳唇啓皓玉明眸漾寒水方

平與麻姑相期永不死手披黃庭經金字寫青紙胡為  
謫人間離合溢悲喜妖桃凝露珠東風任吹洗

庭下幽花幕寒霧金鴨冷烟無一縷從君別妾駕紅鸞  
望斷三山無覓處平時曲調休重舉長袖空垂不成舞  
醒眼牽愁送春去獨立殘陽與誰語

英英玉山禾乃是鳳凰食鳳凰殊未來禾生亦何益幽  
香眷春盡孤根含露寂委棄同蒿萊咄嗟人莫識

自君之往矣幽房守歲華眉頭勻翠淡裙帶縷金斜魂

魄空成夢音書不到家憑誰度庾嶺和淚寄梅花  
粉黛原知假丹書豈是真桃花初過雨溪水暗流春眼  
眼隨雲斷書書託雁頻漁郎自迷路枉殺武陵人  
不作巫山雨螺川久住家欲知冰未釋須信玉無瑕對  
局拈碁子開窓摘杏花誰能諳此意紅日又西斜

妾薄命

雌鳳始營巢妖桃半敷萼憶昔嫁君時相逢一何樂朱  
顏妾未變白眼君先惡君恩不下濟妾意正難託空牀

春寂寥孤燈夜蕭索哀絃時一彈彈終淚還落

怨別二首

渡江君別妾恨不如桃葉桃葉解隨君渡江不用楫妾  
既不得隨渡江楫如飛自憐妾命薄江頭還獨歸一步

一回首碧雲凝落暉空將盈掬淚和粉灑羅衣

古詩云  
桃葉復

桃葉渡江  
不用楫

團扇不遮面欲君永相見胡為忽別妾船逐南風便君  
行妾獨處妾復誰為主正似晚春花零落隨風雨有情



頻寄書莫令書更疎却羨路傍草到處逢君車

古詩云  
團扇復

團扇團扇遮人面相見  
不相親不如不相見

### 代古相思

妾面如花開妾心似蘭花  
花開色易衰蘭死香不已  
願持枯蘭心終焉託君子  
君行胡不歸兩見秋風起  
鴻雁只空來音書無一紙  
夜夜夢見君朝朝懶梳洗  
不憶霜月前絲桐為君理  
千古萬古悲悠揚逐流水

### 坡山五仙觀

天上五仙人騎羊各五色手持六巨穗翱翔遠城壁瞥  
然乘雲烟諸羊化為石至今空留祠異像猶可識曾聞  
經猛火毫髮無痕跡五羊寧復來三說頗難測只憂風  
雨至一朝隨霹靂君不見匡廬劉蛻之洞天萬象森羅  
無一尺

賀姜伯耀見贈醉吟畫詩

蒼崖一萬丈中瀉白玉泉飛鳥度不得而我長攀緣洗  
盡心地垢吟成元化篇更復有何物一尊當我前忽逢

姜伯輝夾量涵冰淵開談了無迹所得全于天便欲脫  
青衫泛我江東船結交要終始相忘復頽然徑呼妙手  
畫秋江霜景全冰輪正卓午照影無陂偏誰能騎蹇驢  
世路空流連咄哉可以往揮手從飛仙

青山集卷六

欽定四庫全書

青山集卷七

宋 郭祥正 撰

五言古詩

追和李太白姑孰十詠

姑孰溪

源從丹湖來奔流朝北極  
雙橋跨長虹千艘濟民食  
日華動清曉岸柳搖行色  
文王未出獵垂竿人莫識

丹陽湖

湖廣際長天永日微風止菱歌一舟去雪陣羣鷗起荷  
香迷近遠秋色瑩表裏試問賀季真何如鏡湖水

謝公宅

山腰存廢址昔是玄暉宅林藏幽鳥聲月弄野棠白高  
賢百年盡遺事千古積此興欲誰論摩挲問磐石

凌敲臺

高臺築千尋勝景供遠目雲烟護城郭吳楚接川陸不  
知歌舞散雌鳳叫空竹鬼火照殘碑應有精靈讀

桓公井

環營鑿九井井深泉不竭  
舊甃缺瓊瑤新苔荒歲月重  
吟太白題興自柏公發我欲  
喚常娥團圓伴澄澈

慈姆竹

一種碧琅玕攢根繞蒼島  
濃陰不透日密幄得春早  
笙隨維氏仙釣入蟠溪好  
欲識化龍蛇唯應雪霜保

望夫山

登高望天涯化石與君別  
秋鬢霜露深春衫薜蘿發  
旅

雁只空飛悲烟長不絕行客歸去來芳心可休歇

牛渚磯

長江瀉危磯雷怒安可向烟雲忽藏月鯨鯢互噴浪朱  
衣叱犀火丹青豈能狀引盃聊醉吟徑卧巨鼇上

靈墟山

仙人赴金闕靈墟躡高路空見白雲飛想乘黃鶴去月  
冷步虛壇苔深煉丹處塵寰欲何為光陰等閒度

天門山

巨靈擘蒼山勢分金闕對月引曉嵐交江翻寒影碎雙  
鳬落人間千帆出天外我欲往高吟凌虛踏烟靄

追和李白秋浦歌十七首

碧水碧如淀染成秋浦愁長橋通驛道危堞起朱樓蕩  
槳誰家女菱歌自風流江心雪浪湧知解渡江不却羨  
雲中雁低飛過北州

此夕宿秋浦蕭蕭古岸頭白雲和月散江水晴空流不  
及水中鳥隨波上下游客情須自遣知命適虛舟



水晚舟楫止山寒猿狖稀雖憐秋浦好未敢濯征衣  
霜落荻洲晚水殘魚市衰唯逢採荷女素手理輕絲  
莫聽猿夜啼莫看蘆花雪倦客多少愁離家八九月  
水有錦駝鳥山多杜宇花扁舟投夜泊來自長風沙  
秋水適瀾漫寧分馬與牛酒樓翻擅價不當白狐裘  
秋浦試北望參天九峯奇緣何謫仙客名作碧蓮枝  
萬丈水車嶺還如九疊屏北風來不斷六月亦冰生  
捨檝乘藍輦十里穿松林悲風西北至千千龍鳳吟史

君如杜壯方有愛山心

齊山一百洞咫尺接危梁雨過頻登望逼人松檜香  
清溪十里岸蘆花八月天不惜錦袍濕應須櫂釣船  
秋浦勝姑孰白鷗無數飛謫仙如得句須換一雙歸  
老謝奪秋景橫卷披雲烟寓目不知遠何須家輞川  
鏡潭弄秋月始知秋興長金龜能換酒客鬢不嫌霜  
半空紫微亭翫月動經宿更待雨中來林林看銀竹  
秋浦一何好名因太白聞溪山圍市井鼓角下烟雲

舟次新林先寄府尹安中尚書用李白寄楊江

寧韻二首

金陵龍虎國況與王謝期掛帆須一往願借天風吹昔  
解徐孺榻別來勞夢思鐘峯當北戶浮玉出東池柳青  
白下門鷺棲瓊樹枝但對樽中物何嗟鏡裏絲如聞紫  
泥詔起公翊明時需為天下霖一洗旱暵悲請歌甘棠  
歌翻作新林詩

休居尚蒙祿願赴興龍期況此孱病姿感公久嘸吹相

望止百里株坐徒傾思呼僮刷鶴羽駕言別清池往將  
投新林新林有高枝仰聽鸞鳳音軋軋如抽絲窮陰欲  
雪天燕雀無聲時接物伸妙理運心廣真悲如何持一  
盃要我百篇詩

舟次白鷺洲再寄安中尚書用李白寄楊江寧  
韻二首

白鷺飛還集新沙沒故洲山形龍晦角江氣蜃為樓欲  
問前朝事空懷去國憂鐘聲萬家曉霜葉半城秋化值

唐虞盛人逢王謝流徐生思解榻兵醢可銷愁

燈燦繁星浩夜泊碧蘆洲重城已在望聞公晏層樓華

燈燦繁星浩歌正忘憂賓朋集珠履佳節臨千秋

謂近  
興龍

節願言刷微羽一飲清冷流舉目送高鳳簫韶洗民愁

奉同安中尚書用李白留別王嵩韻送毛王仲

大夫移浙漕

春岸草回綠春江日浮金蘭舟忽言發芥蒂悲我心藹  
藹松柏友雍雍鸞鳳吟願同三歲遘毋使離別侵奈何

千丈材亭亭不依林眷為九重知移節宣德音遂令帝  
王澤深于太湖深豈同失羣鶴飲啄憐空岑誰將勞勞  
歌一漉無瑤琴

將遊宣城先寄賈太守侍御用李白寄崔侍御

韻

我我敬亭山玄暉有佳作賈公乃後身風流今與昨豈  
冠觸姦邪分符宛陵郭江湖暫徘徊烟霄必騰躍予方  
卧閒雲時或乘皓鶴水縮龍蜃歸霜清天宇廓安能坐

隴畝淒淒春藜霍陳蕃有虛榻黃埃侵斷索能如汲黯  
直定許季生諾往哉不可失行聞還鳳閣

追和李白宣州清溪

清溪安在哉欲弄清溪水更邀琴高生攜竿會於此日  
落翠屏間鷄鳴桃花裏不見避秦人誰嗟遠遊子

留別陳元興待制用李白贈友人韻

沈吟澗底松不及堯階草不經君王顧枉被風霜老弱  
羽戀一枝敢思浴天池聞君有餘力何惜一嘯吹青雲

與黃壤迴首隔追隨

留別宣守賈侍御用李白贈趙悅韻

賈誼幾世孫  
閑邪誠所存  
一登御史府  
直氣壯中原  
五載三去國  
出論皆騰宣  
浩養固無害  
宣城況名藩  
下車究積弊  
摘仍除根  
乃遷孔子學  
方庭樹蘭蓀  
講解得董生  
思單先生  
思軒軒慕高  
第各各不窺  
園修橋濟行  
邁掩骼招旅  
魂蕭蕭圉圉  
空清風時掃  
門尋山出近  
郭玉船紅浪  
翻誰為坐上  
客能酬謝公  
言自愧翅翎  
短謬參



鴻與鷓不有瓦礫賤那知圭璧尊矧曰半面雅歲久情  
愈敦三章寵新作詞源何駿奔幾欲效長吉微吟謝高  
軒霜威信凜冽即之自溫溫又如太古鏡磨開蒼蘚昏  
肝膽悉照徹魑魅安敢論行聞紫泥詔沙路馳歸轅豈  
容隱巖子留連愛石盆看君揚天翼北溟終化鷗而我  
隨白鳥丹湖往孤鶩

追和李白郎官湖寄漢陽太守劉宜父

遷客昔登覽愁烟靦四隅身趨夜郎道戀咸陽陽都此

景古來好此人今則無空餘秋夜月素影湛平湖便欲  
凌風去酣歌與君俱

題化城寺新公清風亭用李白原韻

唐時升老亭剪棘今重開南瞻我媚闕北峙凌敲臺新  
公將家子為僧亦多才譬彼獨鶴唳安用羣雞猜或彈  
玉軫琴傾耳濯纖埃清風不知處冷冽時時來吹雲雲  
窈窕吹月月徘徊幽人許共賞渴心咀珍梅了然得真  
味塵魔屢崩摧令妖人豪傑書名駭奔雷

其妖冲雅善  
草書名重大

下  
禪談屢終夕茗酌無餘盃還歌太白篇事往良可哀  
古今儻同轍浩氣不寒灰

太守陳侯見要登黃山送馬東玉遂用李白登

黃山送族弟濟赴華陰韻呈陳侯并送東玉

潁川賢大夫虛懷蘊虹霓雖分銅虎符合在帝苑樓邀  
我登黃山攀雲絕長梯霜林正搖落寒鳥鳴慘淒金牛  
飲空渚天鏡開我壩塵埋宋武妓鮮剥開元碑謫仙送  
客處魂斷白日低松梢想獨鶴軒昂避羣雞還思北溟

釣赤脚蹋鯢鮓時窮壯士恥思遠騷人悲且舉一盃酒  
肯分雲與泥坐有北歸客張帆震雷輦往獻白玉璞不  
憐紅粉啼薦章已交達高名動朝闥君相必見收烟霄  
連橫飛盃停可以起看君開羽儀

盛仲舉秀才歸自九華極談勝賞亟取李白九  
華聯句原韻作二首誌之

客從青陽歸為我談九華雪潭昨夜宿衣上有殘霞鳴  
溜隔深木白鵝栖翠崖南遊豈是遠乘興必攜家

昔號九仙子今名九蓮華  
差差浮碧海葉葉散晴霞  
積靄迷金寺飛流濺雪崖  
開簾陪岸幘須覓夏侯家

青山集卷七